



Bosnia and Herzegovina
Federation of Bosnia and Herzegovina
CANTON SARAJEVO
Anti-Corruption and Quality Control Office

Broj: 20-04-230-1690/22
Sarajevo, 03.10.2022. godine

SKUPŠTINA KANTONA SARAJEVO
KABINET PREDSDJEDAJUĆEG I ZAMJENIKA PREDSDJEDAJUĆEG
SKUPŠTINE KANTONA SARAJEVO
n/r Predsjedavajućeg Skupštine

PREDMET: Zastupnička inicijativa zastupnika Filipović Damira, Informacija, dostavlja se.-

VEZA: Vaš akt broj: 01-04-29326-44/22 od 01.09.2022. godine

Zastupnik u Skupštini Kantona Sarajevo, Damir Filipović, na 54. Radnoj sjednici Skupštine Kantona Sarajevo, u skladu sa članom 213. Poslovnika Skupštine Kantona Sarajevo („Službene novine Kantona Sarajevo“ - Drugi novi prečišćeni tekst – broj: 41/12, 15/13, 47/13, 47/15, 48/16, 9/20, 14/20, 16/22 i 17/22 - Ispravka), uputio je zastupničku inicijativu slijedećeg sadržaja:

„Podnosim inicijativu za donošenje pravnog okvira za suzbijanje korupcije u oblasti prostornog planiranja i građenja na području Kantona Sarajevo, u smislu da se Uredu za borbu protiv korupcije i upravljanje kvalitetom omogući nadzor, monitoring svakog podnesenog upravnog akta u prvostepenom postupku kod nadležnog kantonalnog ili općinskog organa kako bi se smanjio koruptivni rizik kod dobijanja urbanističkih, građevinskih, okolišnih, vodnih i drugih dozvola. Sastavni dio bio bi i Registar takvih podnesaka i omogućavanje javnog praćenja toka upravnog postupka čime bi se smanjila mogućnost koruptivnog i protuzakonitog djelovanja.

Ukoliko je pravno moguće predlažem i da mišljenje Ureda o mogućim koruptivnim rizicima bude sastavni dio upravnog postupka, čak i da mišljenje bude i eliminatoran faktor ukoliko se procjeni da neki predmet predstavlja vid koruptivnog djelovanja ili drugo protupravno postupanje.“

S tim u vezi, ovim putem Vas informišemo da Ured za borbu protiv korupcije i upravljanje kvalitetom Kantona Sarajevo nije u mogućnosti postupiti po navedenoj zastupničkoj inicijativi, prevashodno iz razloga što predloženo izlazi iz djelokruga rada i nadležnosti Ureda, koje su utvrđene Uredbom o osnivanju Ureda za borbu protiv korupcije i upravljanje kvalitetom Kantona Sarajevo („Službene novine Kantona Sarajevo“, broj 40/20 - prečišćeni tekst).

Naime, prevashodno Ured nije nadležan niti za predlaganje niti za donošenje pravnog okvira, a evidentno je da je predmetna materija već normirana Zakonom o prostornom uređenju Kantona Sarajevo, kao materijalnim propisom, te Zakonom o upravnom postupku Federacije BiH, kao procesnim propisom, gdje je jasno propisana uloga svih nadležnih organa, za postupanje u okviru vođenja kako prvostepenog, tako i drugostepenog postupka u segmentu izdavanja urbanističkih, građevinskih, okolišnih, vodnih i drugih dozvola.

Uključivanje i davanje uloge Uredu, u kontekstu „nadzora i monitoringa svakog podnesenog upravnog akta u prvostepenom postupku kod nadležnog organa“, iziskivalo bi prije svega izmjenu naprijed navedenih pravnih propisa, za čije iniciranje Ured nije ovlašten, s jedne strane, kao i dodatne nadležnosti i obaveze Ureda, za koje Ured nije kapacitiran, s druge strane.

Isto se odnosi i na prijedlog da mišljenje Ureda o mogućim koruptivnim rizicima bude sastavni dio upravnog postupka, odnosno da čak to mišljenje bude i eliminatoran faktor ukoliko se procjeni da neki predmet predstavlja vid koruptivnog djelovanja ili drugo protupravno postupanje.

U kontekstu same transparentnosti, a vezano za dio inicijative u kojem se predlaže omogućavanje javnog praćenja upravnog postupka, informišemo Vas da je Ured (podstaknut trendom rasta broja prijava korupcije i drugih nepravilnosti koje Ured zaprima, a koje se odnose na oblast gradnje i prostornog planiranja) već pokrenuo određene aktivnosti, u okvirima propisanih nadležnosti vezanih za prevenciju korupcije, koje se ogledaju u kreiranju i uspostavljanju online Interaktivne mape gradnje objekata i sječe šume na području Kantona Sarajevo, koju je Ured prezentirao javnosti na press konferenciji koja je održana dana 28.09.2022. godine u Sarajevu, a u kojoj će biti prikazana dva segmenta: gradnja i sječa šume.

Kada govorimo o segmentu gradnje, ista će na mapi biti prikazana putem simbola koji će biti u tri različite boje, ovisno od stadija u kojem se gradnja nalazi. S tim u vezi, u mapi će biti prikazani planirani objekti (to su objekti za koje je izdata samo urbanistička saglasnost), objekti u izgradnji (objekti za koje je izdata i urbanistička saglasnost i odobrenje za građenje), te izgrađeni objekti (objekti za koje je izdata i urbanistička saglasnost, i odobrenje za građenje, i upotreba dozvola).

Vezano za sječu šume, u mapi će ista biti prikazana putem simbola u dvije različite boje, u zavisnosti od toga da li se radi o bespravnoj sječi/krcenju šume (što u svakom slučaju mora biti utvrđeno od strane inspekcije na terenu) ili o krcenju/sječi šume po odobrenju nadležnog organa (krcenje/sječa šume na osnovu rješenja/saglasnosti nadležnog organa).

U Interaktivnoj mapi javnosti će biti dostupni filteri za pretragu, pomoću kojih će se moći vršiti brza pretraga, sve u zavisnosti od interesovanja i preferencija lica koje pretražuje.

Osim naprijed navedenog, na ovom mjestu je veoma bitno napomenuti da je Ured paralelno sa uspostavljanjem Interaktivne mape, pokrenuo aktivnosti na uspostavljanju analitičko-statističkog paketa, a sve sa ciljem kratkoročnog i dugoročnog praćenja eventualnih koruptivnih pojava i ponašanja u ovoj oblasti (kao što je npr. praćenje broja izdatih dozvola/saglasnosti tokom mandata općinskih načelnika, praćenje eventualnog porasta broja izdatih dozvola pred istek mandata, što može ukazivati na eventualne koruptivne aktivnosti koje se odvijaju u pozadini i pogodovanje investitorima nauštrb javnog interesa i sl.), te same prevencije, sprečavanja i suzbijanja finansiranja političkih partija kroz ovu oblast, obzirom na velike količine novca koje su u opticaju i kojima raspolažu investitori kojima se često pogoduje na način da im se daju saglasnosti i odobrenja za građenje, u skladu sa njihovim "povećanim apetitima", a nauštrb javnog interesa (ekologija, prirodni resursi, kvalitet života i zdravlje ljudi).

Naime, kada govorimo o korisnosti Interaktivne mape, navedeni analitičko-statistički paket je ključni i neizostavan element, bez kojeg bi navedena mapa imala samo informativni karakter, bez dodatnih mogućnosti pretraživanja, praćenja i sl., a što je od presudne važnosti kada govorimo o prevenciji i borbi protiv korupcije uopće.

S tim u vezi, izloženo je nekoliko primarnih ciljeva koji se žele postići, uspostavljanjem navedene mape, i to kako slijedi:

- transparentnost u sektoru/oblasti gradnje i prostornog planiranja
- zaštita prirodnih resursa i životnog prostora
- prevencija i sprečavanje korupcije u sektoru/oblasti gradnje i prostornog planiranja
- prevencija i sprečavanje finansiranja političkih partija, posebno u ključnim i rizičnim periodima – izbori, promjene vlasti...
- prevencija i sprečavanje ulaganja tzv. "prljavog novca", koji je stečen na nelegalan način, veoma često od međunarodne trgovine narkoticima i pranje tog novca kroz sektor građenja i prostornog planiranja, i to kroz investicije u građevinske projekte.

Očekivanja Ureda su da će ovaj alat, svoj puni značaj i svrsishodnost dobiti protekom vremena, jer će upravo dostupnost podataka kroz ovu mapu, a posebno podataka o planiranoj gradnji,

omogućiti pravovremenu reakciju šire javnosti, a sve sa ciljem sprečavanja nastanka štetnih posljedica koje određena gradnja može prouzrokovati u budućnosti.

Takođe, ovim putem Vas informišemo da Ured trenutno provodi aktivnosti na dogradnji Interaktivne mape, u smislu da će u istoj biti ucrtane vodozaštitne zone, kao i druga zaštićena područja koja se nalaze na teritoriji Kantona Sarajevo, te će se kroz istu moći pratiti gradnja objekata i u ovim područjima, na način da će navedeni informatički alat putem „red flag“ sistema upozoravati na svaku izdatu saglasnost/odobrenje za građenje u ovim područjima, a što će doprinijeti povećanju transparentnosti i omogućiti građanima da blagovremenu reaguju i eventualno spriječe štetne posljedice koje takva gradnja može imati po prirodne resurse i kvalitet života uopće.

Na kraju ističemo da Ured poduzima ono što je moguće u granicama propisanih ovlaštenja, a sve ciljem prevencije i sprečavanje korupcije u oblasti gradnje i prostornog planiranja, svjesni štetnosti koju korupcija u ovoj oblasti ima po prirodne resurse, čovjekovu životnu okolinu, njegovo zdravlje i kvalitet života u konačnici.

S poštovanjem,



Dostaviti:
1.Naslovu;
2.a/a.